

Protocollo posta elettronica certificata

Udin, ai 11 di Zenâr dal 2024

Ai Dirigjents Scolastics
dai Istitûts Comprensîfs statâi
Ai Coordinadôrs Didatics
des Scuelis Paritariis
dai Comuns là che si apliche
la leç 482/99 (lenghe furlane)

e p.c.

Al Diretôr Gjenerâl
dal USR F-VJ

Ai Referents pal insegnament
de lenghe furlane

**Ogjet: Campagne di sensibilizazion e promoziun “Dîs di sî al furlan a scuele par to fi”.
Materiâl di comunicazion in formât digjitâl a disposizion dai Istitûts Comprensîfs e
des Scuelis Paritariis dal teritori di lenghe furlane**

Preseade Dirigjente/Preseât Dirigjent,

intes setemanis che a vegnin tancj gjenitôrs a notaran i lôr fis al prin an de scuele de
infanzia, de scuele primarie o de scuele secondarie di prin grât pal an scolastic 2024/2025.

In chel moment, come che e ripuarte la comunicazion che us è rivade intai dîs passâts
dal diretôr dal USR F-VJ, dot.e Daniela Beltrame, ogni scuele e je clamade a garantî ai
gjenitôrs l'esercizi dal dirit subietîf di zovâsi dal insegnament de lenghe furlane pai propri
fis midiant de iscrizion online (intal câs dal prin cicli di istruzion) o cul modul di cjarte
(intal câs de scuele de infancia).

Par sensibilizâ i gjenitôrs ae sielte cussiente di chest insegnament e ai vantaçs di une
educazion scolastiche plurilengâl, la ARLeF - Agenzie regionâl pe lenghe furlane – in
atuazion dal Plan gjenerâl di politiche linguistiche 2021-2025 de Region Autonome Friûl-
Vignesie Julie – e je daûr a inviâ ancje chest an la **campagne di comunicazion “Dîs di sî al
furlan a scuele par to fi”**. E sarà programade su la stampe regionâl su cjarte e sui socials
dai 18 di Zenâr ai 10 di Fevrâr dal 2024, in concomitance cul periodi bon pes iscrizions.

Par rinfuarçâ cheste azion impuartante di sensibilizazion e cul fin di garantî une
colaborazion sinergjiche simpri plui grande tra ARLeF, USR F-VJ e i Istitûts Comprensîfs e
lis Scuelis Paritariis dal teritori di lenghe furlane, nus fâs plasê condividi materiâi
promozionâi coordinâts de campagne.

Il vuestri Istitût Comprensîf/Scuele Paritarie al podarà doprâ in libertât chescj struments par pandiju midiant dai vuestris canâi di comunicazion offline e online, ancje in ocasion de iniziative “Scuelis Viertis”. Il **kit di comunicazion** prontât al à dentri il file in formât locandine A3 e A4, un banner e une gif animade pal web disponibii in plui formâts standard e il file in formât bon pal canâl WhatsApp.

I materiâi si puedin discjamâ li di cheste direzion:

<https://drive.google.com/drive/folders/1f-ASDSJM2paRF9--ccgCFylbm-cti7HB?usp=sharing>

O visin ancje che, tal câs che lu calcolais bon, o podarês meti un link al sît internet de ARLeF, in particolâr ae pagine dedicate ae campagne [ARLeF Dîs di sî al furlan a scuele par to fi](#), che e propon materiâi di aprofondiment sui vantaçs cognitîfs, sociâi e culturâi di une educazion plurilengâl, dimostrâts a larc de ricercje sientifiche, e lis intervistis a esperts e ricercjadôrs.

O sin sigûrs di cjatâ la poie e la colaborazion preziose dal vuestri Istitût Comprensîf/Scuele Paritarie par informâ i gjenitôrs de pussibilitât di zovâsi dal insegnament de lenghe furlane pai propriis fîs. E je une siele che tal an scolastic passât, pe scuele de infanzie e par chê primarie, e je stade fate dal 79% des fameis.

Par ogni eventuâl altre informazion e scларiment, si pues contatâ il Sportel regionâl pe lenghe furlane, referente dot.e Giulia Della mora, tel. 0432 1743400, e-mail: scuele@sportelfurlan.eu

Vint agrât pe atenzion e pe colaborazion, o cjapìn la ocasion par puartâi i nestris miôr auguris par un bon 2024.

Il President
Eros Cisilino
(firme digjitâl)

Campagne “Dîs di sî al furlan a scuele par to fi”

Materiâi di comunicazion di discjamâ:

- Locandine formât A3 in version .jpg e .pdf
- Locandine formât A4 in version .jpg e .pdf
- Banner web formât 1500x625 in version .jpg
- Banner web formât 720x300 in version .jpg
- Gif animade pal web formât 300x300
- Gif animade pal web formât 500x500
- Gif animade pal web formât 750x750
- Imagjin formât WhatsApp